

TANZIA

“In Tuo Lumine”

Kuzaliwa: Mhashamu Baba Askofu Emmanuel Alex Mapunda alizaliwa tarehe 10 Desemba 1935 Parangu, Peramiho, kwa Baba Alex Kapangawazi Mapunda na Mama Anna Daniel Soko. Mzee Alex Mapunda alikuwa mwenyeji wa Magagura na Mama Anna Soko alikuwa mwenyeji wa Kijiji cha Mnyonga, karibu na Seminari Kuu ya Peramiho. Kwa hiyo Mzee Alex Mapunda na Mama Anna Soko walikuwa Parangu kwa sababu wakati huo Alex alikuwa anafundisha Shule ya Msingi Parangu, Peramiho.

Sakramenti: Mtoto Emmanuel Mapunda alibatizwa tarehe 15/12/1935, ikiwa ni muda mfupi tu baada ya kuzaliwa kwake, katika Kanisa la Peramiho.

Kwa vile Mzee Alex alikuwa mwenyeji wa Magagura, baada ya muda wake wa kazi kupita, alirudi kwake Magagura na familia yake. Tarehe 14/11/1945 alipata Sakramenti ya Kipaimara katika Kanisa la Magagura.

Baada ya muda wake wa malezi Seminari Kuu kuisha, Emmanuel alipata Daraja ya Upadri hapo tarehe 08/09/1965 na Mhashamu Askofu Yakobo Y. Komba.

Elimu na Malezi kufikia Upadri: Emmanuel Mapunda alisoma Shule ya Msingi Magagura Std. I – IV toka mwaka 1944 hadi mwaka 1947.

Baadae, alijiunga na Seminari Ndogo ya Kigonsera kwa ajili ya Malezi na Elimu ya Msingi na Sekondari (Upper Primary and Secondary School Education) toka mwaka 1947 hadi mwaka 1957. Katika kipindi hicho, mwaka 1955, alifanya Mtihani wa *“Tanganyika Territorial Standard X Examination”* na kufuzu vema.

Alijiunga na Seminari Kuu Peramiho mnamo mwaka 1957 kwa masomo ya Falsafa na kuhitimu mwaka 1959. Mara baada ya kuhitimu masomo ya Falsafa aliendelea na masomo ya Teolojia, katika Seminari hiyo hiyo, na kuhitimu mwaka 1965.

Utume baada ya Upadri: Mara baada ya kupadirishwa, Pd. Emmanuel Mapunda alitumwa kuwa Paroko Msaidizi, Parokia ya Matogoro, ambako alifanya utume huo toka Januari hadi Agosti 1966; na baada ya hapo alitumwa kuwa Mlezi na Mkufunzi wa Seminari Ndogo ya Hanga na akatumikia hadi mwishoni mwa 1967; wakati huo Seminari hiyo ilikuwa chini ya Jimbo la

Songea. Toka mwaka 1968 hadi 1969, alitumwa kuwa Paroko Msaidizi wa Parokia ya Songea na akaongezewa jukumu la kufundisha Dini katika Shule za Sekondari mjini Songea.

Mwaka 1970 Pd. Emmanuel Mapunda alitumwa kwa mara ya kwanza Seminari Kuu Peramiho kuwa Kiongozi wa Kiroho (*Spiritual Director*).

Utume huo ulikatishwa alipotumwa masomoni Roma, na baada ya kurejea toka masomoni, mwaka 1973 alitumwa tena Seminari Kuu, Peramiho, kuwa Mlezi na Mkufunzi. Kuanzia mwaka 1976, pamoja na majukumu mengine, aliihudumia Seminari Kuu kama Kaimu Gambera wa Seminari hiyo hadi mwaka 1980 kabla ya kwenda tena masomoni Roma.

Baada ya kuhitimu masomo yake na kurejea Jimboni, mwaka 1983 alirudishwa tena kwa mara ya tatu Seminarini Peramiho mwaka 1983 kuwa Mlezi na Mkufunzi hadi mwaka 1986. Katika awamu hiyo ya tatu ya kufanya utume Seminari Kuu Peramiho, alikaimu tena ugambera kuanzia Desemba 1985 hadi Desemba 1986 alipoteuliwa kuwa Askofu wa Kwanza wa Jimbo Jipya la Mbinga.

Mwaka 2013, kama Askofu Mstaafu wa Jimbo la Mbinga, alirudi tena kwa mara ya nne kuwa Mlezi na Mkufunzi katika Seminari Kuu ya Peramiho, kila wiki, akitokea Parokiani Nangombo, makazi yake baada ya kustaafu hadi umauti ulipomkuta.

Masomo ya Juu Kipindi cha Upadri: Kuanzia mwaka 1970 hadi 1973 Pd. Emmanuel Mapunda alitumwa Roma, Italia, kusomea Teolojia ya Maadili, Shahada ya Uzamili, katika Chuo Kikuu cha Kipapa Gregoriana na akiwa akiishi katika Hosteli ya Mt. Petro.

Pd. Emmanuel Mapunda alitumwa tena masomoni Roma, Italia, mwaka 1980 kwa ajili ya masomo kuelekea Shahada ya Uzamivu katika Teolojia ya Maadili na alihitimu mwaka 1983. Andiko lake la mwisho la Shahada ya Uzamivu lilikuwa *“Ukweli kadiri ya Wangoni wa Kusini Magharibi mwa Tanzania na Elimu ya Maadili ya Kikatoliki”*

Uaskofu wa Jimbo la Mbinga: Tarehe 24/12/1986 Pd. Emmanuel Mapunda aliteuliwa na kutangazwa na Baba Mtakatifu Yohane Paulo II kuwa Askofu wa Kwanza wa Jimbo Jipya la Mbinga. Uteuzi huo ulifuatiwa na kuwekwa wakfu na Baba Mtakatifu mwenyewe hapo 06/01/1987 huko mjini Roma, Italia. Alisimikwa kuwa Askofu wa kwanza wa Jimbo la Mbinga hapo tarehe 15/03/1987 katika

Kanisa la Mtakatifu Alois Gonzaga, Mbinga. Kwa ajili ya uaskofu wake alichagua kaulimbiu yake *“In tuo lumine”* yaani *“katika mwanga wako.”*

Kustaafu Uaskofu wa Jimbo la Mbinga: Baada ya kutimiza miaka 75 ya kuzaliwa na baada ya kuomba kustaafu na kukubaliwa, Baba Askofu Emmanuel Mapunda alistaafu Uaskofu wa Jimbo la Mbinga hapo tarehe 12/03/1911.

Maradhi na Kifo: Baba Askofu Emmanuel Alex Mapunda alianza kuugua siku ya Jumamosi tarehe 11/05/2019, akiwa huko Parokiani Nangombo, kwenye makazi yake baada ya kustaafu. Siku hiyo aliamka mchovu na hana nguvu. Alichukuliwa mara na kupelekwa Mbinga Mjini, ambapo Waganga na Wahudumu wa Zahanati ya Jimbo ya Mtakatifu Gabrieli walimfanyia uchunguzi na huduma ya kwanza. Katika uchunguzi wao waligundua kuwa sukari ilikuwa imeshuka sana. Waliamua kumpeleka mara Hospitali ya Mtakatifu Josef, Peramiho. Uchunguzi wa awali ulithibitisha kuwa kiwango cha Sukari mwilini kilizidi kushuka na pia kwa uchunguzi zaidi iligunduliwa kuwa mapafu yaliathirika kiasi cha kuzua tatizo katika mfumo wa mzunguko wa hewa ya Oxygen mwilini. Hali hiyo ilimpelekea kupumua kwa shida, na kwa hiyo, pamoja na matibabu mengine, iliwapelekea madaktari wamwekee mashine ya Oxygen ili kumsaidia kupumua. Tarehe 16/05/2019, kwa ushauri wa madaktari, iliamuriwa kuwa apelekwe Hospitali ya Taifa Muhimbili kwa uchunguzi na matibabu zaidi. Baba Askofu Mstaafu Emmanuel Mapunda alisafirishwa kutoka Uwanja wa Ndege wa Songea saa 9.50 alasiri. Wakiwa safarini angani, majira ya saa 11.05 jioni, Askofu Mstaafu alikata roho.

Wasifu wa Baba Askofu Emmanuel Mapunda: Mhashamu Baba Askofu Mstaafu Emmanuel Mapunda alikuwa kiongozi na mlezi makini wa kiroho, aliyeshenehi vipaji vingi kama lugha na mziki, kuzungumza kidogo lakini kutenda kwingi, mwenye nidhamu ya kuzingatia muda, na juu yake tunu za upole, unyenyekevu na upendo kwa kundi alilokabidhiwa hasa kwa kuzingatia maisha yake kama mchungaji parokiani, mlezi na mkufunzi katika taasisi za malezi kuanzia Seminari Ndogo hadi Seminari Kuu.

Lakini pia kama Askofu, alijidhihirisha kuwa kweli **Mchungaji Mwema, “Pastor Bonus”**, aliyewafikia na kufikiwa na wengi wakati wote. Kwa jinsi hiyo, na kufuatia kaulimbiu yake ya uaskofu *“katika Mwanga wako”* tutamkumbuka kama Mtume wa kweli na mwenye moyo unaowaka ambaye alikuwa kati yetu *“kuelekea Emmaus”* ili apate kutuonesha sisi kwa Bwana.

Mhashamu Baba Askofu Mstaafu Emmanuel Mapunda alikuwa mchaji sana. Alizingatia sana maadhimisho matakatifu, vipindi vya sala, na ibada kwa Mama Bikira Maria. Kila siku alikuwa anahakikisha anatimiza mafumbo yote

ya Rozari Takatifu na mara nyingi mbele ya Ekaristi Takatifu. Kwa ujumla wake, maisha yake ya kiroho na utendaji wake ni shule na urithi mkubwa kwetu.

Kumbukumbu: Mhashamu Baba Askofu Mstaafu Emmanuel Mapunda atakumbukwa, kwanza, kama Askofu Muasisi wa Jimbo la Mbinga. Yeye ndiye alitujengea sura na dira ya Jimbo letu la Mbinga. Aliasisi Jimbo katika mazingira magumu, kama ilivyo mwanzo wa jambo lolote lenye thamani ni mgumu sana.

Lakini pia atakumbukwa kwa kufanikisha kuliingiza Jimbo katika Udugu na Jimbo la Wuerzburg, Ujerumani, hatua ambayo kwa njia yake ilianza kufungua milango kwa kasi ya maendeleo katika Jimbo letu ikiwamo miundombinu, uboreshaji, upanuzi na uanzishwaji wa taasisi za maendeleo ya kiroho kuanzia ngazi ya vigango, parokia hata Jimbo; na maendeleo jamii ikiwamo afya, elimu na maji. Kanisa hili na makazi ya kiaskofu ni baadhi tu ya matunda ya udugu huo.

Mapadri wengi tunaofanya utume katika Jimbo letu ni mapato ya malezi na mafunzo yake Seminarini. Aidha watawa wengi, kwa namna ya pekee Watawa wa Huruma wa Mt. Vincent wa Paulo, aliwapokea yeye wakati wa nadhiri zao.

Wanajimbo, tutamkumbuka pia kwa misingi aliyotuwekea ya mahusiano mazuri, kiutendaji, pamoja na viongozi wa dini na madhehebu mbalimbali; lakini pia mahusiano mazuri na serikali na taasisi zake, na hata viongozi wa siasa.

Shukrani: Familia ya Mungu ya Jimbo la Mbinga inawashukuru kwanza wazazi wa Baba Askofu Mstaafu Emmanuel Mapunda kwa malezi na mafunzo waliompa hata kumjengea mazingira ya wito wa upadri, na hivi sisi kubahatika kuwa na askofu makini na mzalendo kama huyu. Wanandugu, tunawaomba baraka tele kwa Mungu.

Tunawashukuru pia, wale wote waliohangaikia afya yake hasa katika kipindi cha hapa mwishoni. Kipekee sana Waganga na Wauguzi wa Zahanati za Nangombo na Mt. Gabrieli, Mbinga; lakini zaidi sana Madakatari na Wauguzi wa Hospitali ya Mt. Yosef, Peramiho. Lakini pia wale wote waliomsaidia kiroho, kwa maombezi na maadhimisho ya Sakramenti, hasa ndugu wa Abasia na Prioress ya Peramiho. Mungu awarudishie mara mia katika ukarimu wake mkuu. Hatutaisahau Kampuni ya Ndege ya Auric na Wafanyakazi wake walioitika kilio chetu mara baada ya kuwaomba msaada wa usafiri.

Aidha, wale wote waliokuwa tayari kumsaidia huko ambako alielekezwa kwa ajili ya matibabu zaidi, tunasema ahsante kwa utayari wao. Tunaishukuru sana Sekretariat ya Baraza la Maaskofu Katoliki Tanzania kwa kuwa tayari kuratibu shughuli za msiba baada ya kifo chake huko Dar es Salaam hata kusimamia kuurejesha msiba Jimboni Mbinga. Mungu azidi kuibariki.

Mwisho, lakini siyo kwa umuhimu, tunawashukuru sana waratibu wa taratibu za kumsindikiza mzee wetu katika nyumba yake ya kudumu hapa Jimboni kupitia Taasisi na Kamati mbalimbali. Na ninyi nyote mliotuunga mkono kwa ujio wenu na michango yenu, tunasema ahsanteni sana. ***Raha ya Milele mpe Ee Bwana, na Mwanga wa milele umwangazie; Apumzike kwa Amani. Amina!***